

弇山堂別集

(二)

弇山堂別集卷十七

吳郡王世貞元美著

皇明奇事述二

三鄂公

唐開府儀同三司鄂國公尉遲敬德宋少保萬壽觀
使鄂國公岳飛明太子少保中書平章軍國重事
鄂國公常遇春三公皆封鄂皆驍勇善戰稱萬人敵
而勲位亦相類常公與尉遲公俱謚忠武岳公初謚
武穆後改謚亦忠武又與常公俱贈王爵

三文成

漢晉侯張良謚文成 明誠意伯劉基新建伯王守
仁亦謚文成三公皆書生胙茅土其智略勲名略相
彷彿

內閣三楊

正統初內閣三相爲楊文貞士奇楊文敏榮楊文定
溥號三楊以居第爲別文貞曰西楊文敏曰東楊文
定曰南楊西楊以少師八十卒東楊亦以少師七十
卒南楊以少保七十五卒其在閣遠者四十餘年最
近者亦十六年

吏部二楊

楊文襄公一清三總制三邊長吏部加少師太子太師楊襄毅公博再總督薊遼一總督宣大長吏部亦加少師太子太師二公俱弱冠登第姓望名位俱略相當有極同者俱擅將帥之略而所至少戰功有極不同者文襄至內閣首揆壽高於襄毅一紀而無子襄毅子多而且貴顯

嘉靖三楊

嘉靖中前後諫臣獨楊最楊繼盛楊爵疏最直傳天下而得禍俱慘爵僅獲終牖下其後同贈官賜祭爵獨缺謚

三文臣戰功伯爵皆王姓

文臣封伯雖前後十人然以戰功得者僅三人靖遠伯驥威寧伯越新建伯守仁耳皆王姓威名皆盛於諸伯大奇也

東西王

王文端直文安英同舉進士爲翰林庶吉士同侍讀同爲坊長少詹禮左侍對掌制亦以居第爲稱文端曰東王文安曰西王

吏部三王

吏部尚書凡三王文端公直至少傅太子太師年七

十八致仕以八十四卒贈太保忠肅公翱至太子太保八十四致仕以其年卒贈太保端懿公恕至太子太保七十八致仕以九十三卒贈太師三公年壽名德卹典皆彷彿又皆王姓其後王太原瓊以七十三再入吏部王陽城國光七十一尚為吏部俱加太子太保俱王姓俱山西而俱七十餘蓋五王矣若後二名德小劣所謂一解不如一解

又有奇者文端忠肅去王恭襄初為吏部及今陽城相去正可一甲子而恭襄以前壬午謫戍陽城後壬午削職

又二王

王襄敏越以二十六舉進士累官西北以戰功積官至兵部尚書左都御史封太子太傅咸寧伯坐奸黨流徙安陸自列還鄉以太子太保左都總督陝西三邊軍務加少保太子太傅卒於位年七十三王恭襄瓊亦以二十六舉進士累官兵部尚書積軍功加少師太子太師改吏部亦坐奸黨謫戍綏德自列還鄉以兵部尚書右都總督陝西三邊軍務加太子太保入為吏部卒於位年七十四二公姓同入仕之歲同才略功名年位譏讒事事同

又二王

正德中王恭襄公瓊爲兵部尚書王康毅公憲爲左侍郎恭襄入吏部康毅即代之世廟初同解任康毅再起以尚書兼右都總制陝西三邊軍功加太子太保入長都察院恭襄代之亦以尚書兼右都用軍功加太子太保入長吏部康毅後復長兵部在一時卒俱贈少保無不同者

又兩王司空

正統中有王永和者以給事中遷王永壽者以御史遷先後爲工部左侍郎同署事若兄弟然永和死土

本之難贈本部尚書而永壽亦於其月進本部尚書

湖廣二王徹侯

湖廣蘄水王聰孝感王忠俱從靖難聰爲都指揮忠爲都督僉事同日封奉天靖難推誠宣力武臣特進柱國聰武城侯忠靖安侯永樂七年聰爲左副將軍忠爲左叅將同日從淇國公北征同日戰歿於臚胸河年皆五十餘自姓氏鄉曲年齒官爵封拜陣亡月日無不同者

又二王封奪

永樂元年都指揮同知王友封清遠伯六年以安南

功進封侯後以北征不遵詔下獄奪爵都指揮王通以父直死事封武義伯七年以山陵功進封侯後以守安南擅棄地下獄奪爵二侯皆王姓而進封奪爵事體亦同

又二王

萬曆十二年十二月禮部右侍服滿王錫爵吏部右侍郎王家屏同日入閣錫爵爲文淵家屏爲東閣俱大學士

吾州四王

萬曆壬午甲申間世貞以南大理鄉還里而王禮侍

錫爵給假省親不出余弟世懋與禮侍之弟昇爵俱以提學副使一自陝西一自河南乞歸二子生同歲同爲禮部郎同歲遷提學又同歲請告而余召爲刑部侍郎不赴一時頗稱之爲四王者以其名位里居之相埒也余實不敢望禮侍尋召拜相余弟再補福建而昇爵服除卒余弟轉少卿亦前卒

吾郡二吳宗伯

吾吳郡弘治中吳公寬以禮書學士東閣管誥勅嘉靖中吳公一鵬亦如之二公俱累官內翰而俱不得入相歿俱贈太子太保俱得上謚一文定一文端今

吳中人俱稱吳閣老

吾郡三陳祭酒

吾郡成化陳鑑自侍讀學士轉祭酒正德陳霽自南
侍講學士轉祭酒嘉靖陳寰以司業轉祭酒祭酒儒
師重職步伍八座不當止而三公同止是官又同陳
姓同爲吾吳人甚奇

湖廣二張

湖廣嘉靖中張公璧以太子太保東閣大學士張公
治亦以太子太保文淵閣大學士在位俱踰歲加宮
保不數日而病病未久而逝俱贈少保一謚文簡一

謚文毅

嘉靖四張

鄞人張邦奇爲吏部左侍郎蜀人張潮爲右侍郎邦奇以翰林院學士掌院潮遷左侍郎兼學士同日加太子賓客未幾邦奇進禮部尚書掌詹事改南吏部潮進尚書繼之而楚人張璧以禮部尚書兼學士掌部張治以學士進吏部右侍郎四張皆光學也而皆在一時

華亭二張

華亭張公瑩爲南大司馬叅贊加太子少保後二年

同邑張公悅繼之亦加太子少保卒追贈太子太保
一謚莊懿一謚莊簡二公年位名德里居相近今有
混以爲一人者

江西二羅

江西成化丙戌狀元羅公倫以言事外謫後復官止
修撰贈左諭德謚文毅嘉靖己丑狀元羅公洪先亦
以言事爲民止贊善贈光祿少卿謚文恭相去一甲
子地同大魁同言事同講學同從六品得謚同贈官
從五品同尤奇絕

內閣二劉

正統戊辰進士壽光劉翊年二十三博野劉吉年二十二同爲庶吉士同授編修修史經筵進秩無不同者又同主考己丑會試翊以吏左侍兼學士吉以禮左侍兼學士同日入閣同日進尚書翊戶部吉禮部同日加太子少保自是加太子太保及柱國翊爲謹身殿吉爲武英殿皆同日最後翊致仕而吉留至少師首殿以卒然同贈三公翊得太保吉得太師同謚文翊得和吉得穆

又三劉

劉文靖健在內閣二十年正德元年以少師首揆致

仕四年少傳字由吏部入閣六日而歸省遂致仕五年少傳忠復入閣不滿歲亦歸省遂致仕三人在相位有久速人亦薰蕕但皆劉姓而皆河南人爲異耳

二譚

譚姓最少而宣德間有譚廣譚青者一時同爲左都督俱善將騎兵虜中人畏之俱號譚家馬青子襲指揮亦名廣

二徐

今人但知吏徐晞之爲兵部尚書而不知徐輝之爲戶部尚書也輝在高帝時由倉部主事郎中進侍